

Հավելված
Հայաստանի Հանրապետության
փաստաբանների պալատի խորհրդի
20.03.2017թ. թիվ 5/15-Լ որոշման

ՀՀ փաստաբանների պալատի
խորհրդի նախագահ՝
Արա Զոհրաբյան

Կ Ա Ր Գ

ԱՅԼ ՊԵՏՈՒԹՅԱՆ ՓԱՍՏԱԲԱՆԻՆ ՀԱՎԱՏԱՐՄԱԳԻՐ ՏԱԼՈՒ ԵՎ ՀԱՎԱՏԱՐՄԱԳՐԻ ԳՈՐԾՈՂՈՒԹՅՈՒՆԸ ԴԱԴԱՐԵՑՆԵԼՈՒ ՄԱՍԻՆ (նոր խմբագրությամբ)

I. ԸՆԴՀԱՆՈՒՐ ԴՐՈՒՅԹՆԵՐ

1.1. «Այլ պետության փաստաբանին հավատարմագիր տալու և հավատարմագրի գործողությունը դադարեցնելու մասին» սույն կարգը (**այսուհետ՝ Կարգ**) սահմանում է Հայաստանի Հանրապետության փաստաբանների պալատի (**այսուհետ՝ ՀՀ փաստաբանների պալատ կամ Պալատ**) անդամ չհանդիսացող, սակայն այլ պետությունում փաստաբանական գործունեություն իրականացնելու իրավունք ունեցող անձին (**այսուհետ՝ Այլ պետության փաստաբան**) Հայաստանի Հանրապետության տարածքում փաստաբանական գործունեություն իրականացնելու համար հավատարմագիր տալու և տրված հավատարմագրի գործողությունը դադարեցնելու ընթացակարգերը:

1.2. Հավատարմագիրը հանձնում է ՀՀ փաստաբանների պալատի նախագահը:

II. ՀԱՎԱՏԱՐՄԱԳԻՐ ՏԱԼՈՒ ԿԱՐԳԸ

2.1. Այլ պետության փաստաբանին հավատարմագիր տալիս է Պալատի խորհուրդը կամ Պալատի նախագահը՝ Պալատի կանոնադրության և սույն կարգի համաձայն:

2.2. Այլ պետության փաստաբանը կարող է հավատարմագրվել մեկ տարի ժամկետով կամ կոնկրետ գործով:

2.3. Այլ պետության փաստաբանը հավատարմագրվելու համար Պալատի նախագահին է ներկայացնում հետևյալ փաստաթղթերը՝

ա) Պալատի նախագահի կողմից սահմանած ձևի դիմում (դիմումի մեջ պետք է լինի նաև նշում Փաստաբանի վարքագծի կանոնագրքի պայմաններին ծանոթ լինելու, դրանք ընդունելու և իր նկատմամբ կիրառելու վերաբերյալ).

բ) այլ պետությունում փաստաբանների կառույցի կողմից տրված արտոնագրի՝ նոտարի կողմից պատշաճ վավերացված պատճենը հայերեն

թարգմանությամբ (Արցախի Հանրապետության փաստաբանի դեպքում՝ միայն արտոնագրի պատճենը)։

գ) հավատարմագրման համար անհրաժեշտ վճարը մուծելու փաստը հավաստող փաստաթուղթը (դիմումը մերժվելու դեպքում, գումարն ենթակա է վերադարձման), եթե դիմողն ազատված չէ վճարից։

դ) անձնագրի պատճենը (օտարալեզու անձնագրի դեպքում՝ հայերեն թարգմանությամբ, վավերացված նոտարի կողմից),

ե) Հայաստանի Հանրապետության օրենսդրությանը չտիրապետելու դեպքում՝ ՀՀ փաստաբանների պալատի անդամ փաստաբանի (**այսուհետ՝ Օժանդակող փաստաբան**) գրավոր հավաստումը՝ Այլ պետության փաստաբանին գործով օժանդակություն ցույց տալու մասին։

2.4. Առաջին անգամ հավատարմագրելու մասին դիմում ներկայացրած Այլ պետության փաստաբանին հավատարմագիր տալու հարցը որոշում է Պալատի խորհուրդը՝ դիմումը ստանալու օրվանից երեսուն օրվա ընթացքում։ Հայաստանի Հանրապետության օրենսդրությանը տիրապետելու հարցը ճշտելու նպատակով խորհրդի նիստին կարող է հրավիրվել նաև Այլ պետության փաստաբանը, որը պարտավոր է մասնակցել խորհրդի նիստին և պատասխանել Պալատի խորհրդի անդամների հարցերին (հարցերը կարող են վերաբերվել Հայաստանի Հանրապետության քաղաքացիական, քրեական կամ վարչական դատավարության օրենսգրքերի, իսկ կոնկրետ գործով հավատարմագրման դեպքում՝ նաև այդ գործի հետ կապված նյութական նորմերի դրույթներին)։ Հայոց լեզվին չտիրապետող Այլ պետության փաստաբանը Պալատի խորհրդի նիստին մասնակցում է իր կողմից և իր հաշվին հրավիրած թարգմանչի հետ միասին։

2.5. Երկրորդ կամ հերթական անգամ հավատարմագրելու մասին դիմում ներկայացրած Այլ պետության փաստաբանին հավատարմագիր տալու հարցը որոշում է Պալատի նախագահը՝ դիմումը ստանալու պահից յոթ օրվա ընթացքում։

2.6. Հայաստանի Հանրապետության օրենսդրությանը չտիրապետող Այլ պետության փաստաբանին տրվող հավատարմագրի մեջ նշվում է նաև՝ **ա)** Օժանդակող փաստաբանի անունը, ազգանունը, **բ)** Օժանդակող փաստաբանի արտոնագրի համարը և **գ)** հավատարմագիրը միայն Օժանդակող փաստաբանի մասնակցության պայմաններում ուժի մեջ լինելու մասին։

2.7. ՀՀ փաստաբանների պալատի խորհուրդը մերժում է Այլ պետության փաստաբանի հավատարմագրումը, եթե՝

ա) չեն պահպանվել Կարգի, մասնավորապես 2.3. կետի պահանջները, կամ

բ) չեն հաստատվել ներկայացված փաստաթղթերի իսկությունը կամ հավատարմագրման համար դիմած անձը իրավունք չունի Հայաստանի Հանրապետությունում զբաղվել փաստաբանական գործունեությամբ, կամ

գ) Օժանդակող փաստաբանի հավաստում չներկայացրած Այլ պետության փաստաբանը չի տիրապետում Հայաստանի Հանրապետության օրենսդրությանը, կամ

դ) Այլ պետության փաստաբանը ՀՀ փաստաբանական դպրոցից որպես կարգապահական տույժ հեռացված է եղել և հավատարմագրման դիմումը ներկայացնելու պահին չի լրացել հեռացման պահից մեկ տարին։

2.8. «Փաստաբանության մասին» ՀՀ օրենքի համաձայն՝ ՀՀ փաստաբանների պալատի նախագահը հավատարմագիր ստացած Այլ

պետության փաստաբանին ընդգրկում է այլ պետության փաստաբանների ցուցակում:

2.9. Հավատարմագրված Այլ պետության փաստաբանը ՀՀ փաստաբանների պալատի անդամ չի հանդիսանում:

III. ՀԱՎԱՏԱՐՄԱԳՐՄԱՆ ԳՈՐԾՈՂՈՒԹՅՈՒՆԸ ԴԱԴԱՐԵՑՆԵԼՈՒ ԿԱՐԳԸ

3.1. ՀՀ փաստաբանների պալատի խորհուրդը կարող է ուժը կորցրած ճանաչել (դադարեցնել) Այլ պետության փաստաբանի հավատարմագրի գործողությունը, եթե՝

ա) Այլ պետության փաստաբանը խախտել է «Փաստաբանության մասին» ՀՀ օրենքի, ՀՀ փաստաբանների պալատի կանոնադրության կամ Փաստաբանի վարքագծի կանոնագրքի որևէ պահանջ.

բ) Այլ պետության փաստաբանը կոնկրետ գործով հավատարմագրված լինելով այլ գործով դատական ներկայացուցչություն կամ պաշտպանություն է իրականացրել.

գ) դադարեցվել կամ կասեցվել է Այլ պետության փաստաբանի փաստաբանական գործունեության իրավունքն այն երկրում, որտեղ իրեն տրամադրվել էր այդ իրավունքը.

դ) Օժանդակող փաստաբանը գրավոր հրաժարվել է իր հավաստումից և Այլ պետության փաստաբանը Պալատի նախագահի գրությունը ստանալուց հետո հինգ օրվա ընթացքում չի ներկայացրել այլ Օժանդակող փաստաբանի հավաստում.

ե) հավատարմագրված փաստաբանը գրավոր դիմում է ներկայացրել իր հավատարմագրի գործողությունը դադարեցնելու վերաբերյալ.

զ) սույն կարգում նշված այլ դեպքերում:

3.2. Կոնկրետ գործով տրված հավատարմագրի գործողությունը համարվում է դադարած Պալատի խորհրդի որոշումն ուժի մեջ մտնելու հաջորդ օրվանից:

IV. ՀԱՎԱՏԱՐՄԱԳՐՄԱՆ ՎՃԱՐԸ

4.1. Կոնկրետ գործով հավատարմագիր ստանալու համար վճարի չափը սահմանվում է **200.000 (երկու հարյուր հազար) ՀՀ դրամ**, բացառությամբ սույն կարգի 4.6. կամ 4.7. կետերում նշված դեպքերի: Հավատարմագրի գործողությունը տարածվում է քաղաքացիական, քրեական կամ վարչական կոնկրետ գործի բոլոր հաջորդական փուլերի նկատմամբ (մինչդատական վարույթ, դատական ատյաններ): Սույն կետում նշված գործով տրված հավատարմագրի մեջ նշվում է գործի համարը, իսկ դրա անհնարինության դեպքում՝ գործն անհատականացնող այլ տվյալներ:

4.2. Մեկ տարվա ժամանակահատվածով հավատարմագիր ստանալու համար վճարի չափը սահմանվում է **1.500.000 (մեկ միլիոն հինգ հարյուր հազար) ՀՀ դրամ**, բացառությամբ սույն կարգի 4.6. կամ 4.7. կետերում նշված դեպքերի:

4.3. Հավատարմագրման վճարն Այլ պետության փաստաբանը վճարում է անկանխիկ՝ ՀՀ փաստաբանների պալատի հաշվին փոխանցելու միջոցով կամ

կանխիկ՝ ՀՀ փաստաբանների պալատի դրամարկղում:

4.4. ՀՀ փաստաբանների պալատի խորհրդի կամ նախագահի կողմից հավատարմագրվելու համար դիմած անձին վերադարձվում է իր կողմից վճարված գումարը, եթե վերջինիս դիմումը մերժվում է:

4.5. Երկրորդ կամ հերթական անգամ հավատարմագրման համար դիմելու դեպքում, Այլ պետության փաստաբանը պարտավոր է կրկին կատարել համապատասխան վճարումը:

4.6. Արցախի Հանրապետության (**այսուհետ՝ Արցախ**) փաստաբանը ազատվում է Այլ պետության փաստաբանի հավատարմագրման վճարից, եթե ունի՝

ա) սույն կարգի հաստատման օրվա դրությամբ Արցախում փաստաբանական գործունեության առնվազն հինգ տարվա ստաժ, կամ

բ) առնվազն հինգ տարի մշտապես բնակվել է Արցախում, կամ

գ) հանդիսանում է Արցախի հանրային պաշտպան և ներկայացրել է Արցախի հանրային պաշտպան հանդիսանալու վերաբերյալ ապացույցը՝ Արցախի փաստաբանների պալատի հետ ունեցած աշխատանքային պայմանագրի պատճենը՝ վավերացված Արցախի փաստաբանների պալատի կողմից:

4.7. Սույն կարգի 4.6. կետի պայմաններին չբավարարող Արցախի փաստաբանի համար սահմանվում են հետևյալ վճարները՝

ա) կոնկրետ գործով հավատարմագիր ստանալու համար վճարի չափը սահմանվում է **30.000 (երեսուն հազար) ՀՀ դրամ**.

բ) մեկ տարվա ժամանակահատվածով հավատարմագիր ստանալու համար վճարի չափը սահմանվում է **120.000 (հարյուր քսան հազար) ՀՀ դրամ**:

4.8. Սույն կարգի 4.6. կետի «գ» ենթակետում նշված դեպքում Արցախի հանրային պաշտպանին հավատարմագիրը տրվում է միայն հանրային պաշտպանության իրականացման նպատակով, որի մասին հավատարմագրի մեջ կատարվում է համապատասխան նշում: Սույն կետում նշված հավատարմագրով հանրային պաշտպանության ոլորտից դուրս ՀՀ տարածքում փաստաբանական գործունեություն իրականացնելն արգելվում է, իսկ նման հանգամանքի բացահայտումը հիմք է հանդիսանում Արցախի հանրային պաշտպանին տրված հավատարմագրի գործողությունը վաղաժամկետ դադարեցնելու համար:

4.9. Հավատարմագրի գործողությունը վաղաժամկետ դադարեցվելու դեպքում հավատարմագրման վճարը վերադարձման ենթակա չէ:

V. ԵԶՐԱՓՈՒԿ ԴՐՈՒՅԹՆԵՐ

5.1. Կարգն ուժի մեջ է մտնում ՀՀ փաստաբանների պալատի խորհրդի կողմից հաստատելու օրվան հաջորդող օրվանից և գործում է անժամկետ:

5.2. Կարգում փոփոխություններ և/կամ լրացումներ կարող են կատարվել միայն ՀՀ փաստաբանների պալատի խորհրդի կողմից:

5.3. Կարգի հետ կապված մեկնաբանությունները (պարզաբանումները) տրվում են ՀՀ փաստաբանների պալատի խորհրդի կողմից՝ վերջինիս նախաձեռնությամբ կամ շահագրգիռ անձի դիմումի հիման վրա: